



四川大學古籍整理研究所編

儒藏

史部
第一二冊

四川大學出版社



四川大學古籍整理研究所 編

儒藏·史部

儒林史傳

第十二冊

四川大學出版社 二〇〇八年

國家「211工程」重點學科建設項目

國家「985工程」創新基地規劃項目

中國孔子基金會重大項目



儒藏

目錄

目錄

歷代名儒傳續	清·朱軾 蔡世遠同訂	一
歷代儒學存真錄	清·田攸編撰	三八七

歷代名儒傳卷之三

隋

王通

王通字仲淹先爲祁人。九世祖寓當懷愍時東遷三傳至元則究道德考經籍卒爲鴻儒江左號王先生先生孫虬值蕭氏禪恥食齊粟北事魏仕至并州刺史家河汾是爲



通高祖。及通父隆傳業教授門徒千餘人。開皇初以國子博士待詔雲龍門。文帝從容問曰。朕何如主。隆曰。陛下聰明神武。得之於天。發號施令。不盡稽古。雖負堯舜之資。終以不學爲累。帝默然久。曰。先生朕之陸賈也。隆乃著興衰要論七篇奏之。帝稱善。四年。通始生。隆筮之。遇坤之師。大父安康獻公占之。曰。是子必能通天下之志。遂名曰通。通六歲而江東平。隆歎曰。王道無叙。天下何爲而一乎。通侍側有憂色。曰。通聞古之爲邦。有長久之策。故夏殷以下。四海常一統也。後之爲邦。行苟且之政。故魏晉以下。九州無

定主也。夫子之歎蓋憂皇綱不振、生人勞於聚斂而天下將亂乎。隆異之、遂告以元經之事、通再拜受之。十八年、隆宴居、歌伐木而召通、謂曰：自天子至庶人、未有不資友以成者。在三之義、師居一焉。小子勉旃、翔而後集。通於是、有四方之志。蓋受書於東海李育、學詩於會稽夏璜、問禮於河東關朗、正樂於北平霍汲、考易於族父仲華、不解衣者六歲、其精志如此。仁壽三年、通既冠、慨然有濟蒼生之心、西遊長安。帝召見太極殿、奏太平十有二策、尊王道、推霸畧、稽今驗古、恢恢乎運天下於指掌。帝大悅、曰：得生幾晚。

下其議於公卿。公卿不悅。楊素、蘇夔、李德林見，通與之言終日，歸而有憂色。門人問，通曰：「素言政而不及化，是天下無禮也。夔言聲而不及雅，是天下無樂也。德林言文而不及理，是天下無文也。王道從何而興乎？時將有蕭牆之釁，通知謀之不用，作東征之歌而歸。帝聞再徵之，不至。大業二年，徵又不至，乃曰：『吾視千載已上，未有若周公焉。其道則一，而經制大備；後之爲政者，有所持循。吾視千載而下，未有若仲尼焉。其道則一，而述作大明；後之修文者，有所折衷矣。』遂續詩書，正禮樂，修元經，讚易道。九年而六經大

就門人自遠而至。其教興於河汾。雍雍如也。通閒居儼然。其動也徐。若有所慮。其行也方。若有所畏。其接長者恭恭。然如不足。接幼者溫溫。然如有就。其使人雖童僕必斂容。鄉人有喪。通必先往。反必後。有水土之役。則具畚鍤以往。曰。吾非從大夫也。其言應而不唱。唱必有大端。或問人善。曰。子知其善。則稱之。不善。則曰。未嘗與久也。其族婚嫁。必具六禮。曰。斯道也。今亡矣。三綱之首不可廢。吾從古。嘗曰。冠禮廢。天下無成人矣。昏禮廢。天下無家道矣。喪禮廢。天下遺其親矣。祭禮廢。天下忘其祖矣。門人有問姚義。孔庭

之法曰詩曰禮不及四經何也。義曰嘗聞諸夫子矣。春秋斷物志定而後及也。樂以和德全而後及也。書以制法從事而後及也。易以窮理知命而後及也。故不學春秋無以主斷。不學樂無以知和。不學書無以議制。不學易無以通理。四者非具體不能及。故聖人後之。然則詩禮何爲而先也。曰教之以詩則出辭氣斯遠暴慢矣。約之以禮則動容貌斯立威嚴矣。度其言察其志考其行辨其德志定則發之以春秋於是乎斷而能變德全則導之以樂於是乎和而知節可從事則達之以書於是乎可以立制知命則申

之以易於是乎可以盡性。若驟而語春秋則蕩志輕義。驟而語樂則喧德敗度。驟而語書則狎法。驟而語易則玩神通聞之曰。姚子得之矣。魏徵問聖人有憂乎。曰。天下皆憂。吾獨得不憂乎。問疑。曰。天下皆疑。吾獨得不疑乎。徵退。通謂董常曰。樂天知命。吾何憂。窮理盡性。吾何疑。賈瓊問何以息謗。曰。無辨。何以止怨。曰。不爭。問事人之道。曰。遠而無介。就而無諂。汎乎利以諷之。無鬪其捷。問君子之道。曰。必先恕乎。爲人子者以父之心爲心。爲人弟者以兄之心爲心。推而達之天下斯可矣。李密問英雄曰。自知者英。自勝

者雄。問勇曰：必也義乎？問王霸之略曰：不以天下易一民之命。房元齡問事君之道曰：無私。問使人之道曰：無偏。問化人之道曰：先正其心。嘗曰：不以伊尹周公之道康其國，非大臣也。不以霍光諸葛亮之心事其君，皆具臣也。又曰：人不里居，地不井授，終苟道也。封禪之費，非古也。其秦漢之侈心乎？又曰：無赦之國，其刑必平。多斂之國，其財必削。又曰：政猛，宥若恩；法速，宥若緩；獄繁，宥若簡。臣主之際，其猜也，宥信。通見牧守屢易曰：堯舜三載考績，仲尼三年有成。三代之興，邦家有社稷焉。兩漢之盛，牧守有子孫焉。不



若是之亟也。無定主而責之以忠。無定民而責之以化。雖欲從之。末由也已。其嘉言懿論。門人相與集而記之。號曰中說。十年。召署蜀司戶。不就。十一年。以著作郎。國子博士徵。竝不至。十三年。江都難作。通寢疾。泣然興曰。生民厭亂久矣。天其或者將啓堯舜之運。而吾不與焉。命也。遂卒。門人諡之曰文中。所續禮論二十五篇。列爲十卷。樂論二十篇。列爲十卷。書一百五十篇。列爲二十五卷。詩三百六十篇。列爲十卷。元經五十篇。列爲十五卷。贊易七十篇。列爲十卷。竝未及行。二子長曰福郊。少曰福時。

論曰、通名跡不見於隋史、故司馬光以爲疑。所引弟子多唐初名臣、朱子以爲福郊、福時之所爲、非通雅意、然亦其平日好高自大之心、有以啓之。又議其續經之僭至等之吳楚。雖然、當隋之時、道術之裂也已久、通獨銳然修周孔之業、倡教河汾、成就後進、其學其識、誠大有以過人者。故朱子又稱其學有可用之實、荀揚韓氏皆不及也。豈不諒哉。康節邵子亦嘗爲之贊曰、錄其所是、棄其所非、君子有歸。斯實平恕之論。

唐

薛收

薛收字伯褒、蒲州汾陰人、道衡之子也。年十二、能屬文。以父不得死於隋、不官仕。郡舉秀才、不應。事王通、與董常、仇璋、程元備聞六經之義、爲高第。通稱之曰、孝哉薛收、行不負於神明。收問仁、通曰、五常之始也。問性、曰、五常之本也。問道曰、五常一也。收問政於仲長子光、子光曰、舉一綱、衆目張。弛一機、萬事墮。不知其政也。收以告通、通曰、子光得之矣。及唐高祖興、收遁入首陽山、將應義舉。堯君素覺之、



儒藏

歷代名儒傳 卷三

迎置其母城中收不得去。後君素東連王世充收遂挺身歸唐。房元齡亟言之秦王。王召見問方略。旨授府主簿。判陝西大行臺金部郎中。是時方討世充。軍事繁綜。收爲書檄露布。或馬上占辭。該敏如素構。初不竄定。竇建德來援世充。諸將爭請斂軍以避其鋒。收獨曰。不然。世充據東都。府庫盈衍。所將兵皆江淮精銳。但苦乏食。爲我所持。今建德總衆以來。若縱之至。必轉河北之粟以饋洛陽。則戰爭方始。偃兵無日。混一之期。殊未有涯也。不若分兵守洛陽。深溝高壘。慎勿與戰。大王親督驍銳。先據成臯。厲兵按



甲、截建德路，以逸待勞，決可克也。建德旣破，世充自下，不過二旬，兩主就縛矣。秦王曰：善。遂禽建德，降世充，一如收策。王入觀隋宮室，夸侈無度，收進曰：峻宇雕牆，殷辛以亡。土階茅茨，唐堯以昌。始皇興阿房而秦禍速，文帝罷露臺而漢祚永。後主曾不是察，奢虐是矜，卒死一夫之手，爲後世笑，何此之能保哉？王重其言。俄授天策府記室參軍，從平劉黑闥，封汾陰縣男。嘗上書諫王畋獵，王荅之曰：成我者卿也。明珠兼乘，未若一言。賜黃金四十鉞。武德七年，寢疾，王遣使臨問，相望於道。又命輿至府，舉袂撫之，論叙平